

Urteko 20. Igandea (C)

LEHENENGO IRAKURGAIA

Auzi-gizona sortu zenidan herri guztirako.

Jeremias liburutik 38,4-6. 8-10

Egun haietan, ministroek esan zioten erregeari:

– Gizon honek bizia zor du! Bere hitzez, hirian gelditzen diren gudariak eta herritar guztiak adoregabetu besterik ez du egiten. Ez da ari herriaren onerako, kalterako baizik.

Sedekias erregeak erantzun zien:

– Zeuen esku duzue! Erregeak ez dezake ezer zuen aurka.

Orduan, hartu eta Melkias errege-familiako printzearen putzuan sartu zuten Jeremias, sokaz jaitsiz. Putzua kartzelako atarian zegoen eta ez zuen urik, lokatza baizik. Jeremias lokatzetan sarturik gelditu zen.

Ebed-Melekek jauregitik berarengana joan eta esan zion:

– Errege jauna, gaizki jokatu dute gizon horiek Jeremias profetarekin: putzura bota dute eta goseak hilko da bertan, ez baitago ogirik hirian.

Orduan, agindu hau eman zion erregeak Ebed-Melek etiopiarrari:

– Joan hiru gizonekin eta atera Jeremias putzutik, hil baino lehen.

Jaunak esana.

SALMOA

Salmoa 39, 2. 3. 4. 18

R.

Jauna, ni laguntzeko presa zaitez.

Jaunarengan jarria nuen itxaropen guztia:
makurtu eta entzun du nire deiadarra. **R.**

Herio Leize sakonetik nau atera.
Haitz gainean tinko jarri ditu nire oinak,
seguruak egin nire pausoak. **R.**

Kantu berria ipini dit ezpainetan,
gure Jainkoarentzat gorespen-kanta.
Askok ikusiko dute hau eta, ikaraturik,
Jaunarengan konfiantza izango. **R.**

Behartsu eta dohakabe naiz,
baina Jauna da nitaz arduratzen.
Zu zara nire laguntzaile eta askatzaile,
ene Jainko, ez luza! **R.**

BIGARREN IRAKURGAIA

Ekin diezaiogun etsi gabe aurrean dugun lasterketari.

San Paulo apostoluak Hebrearrei egindako gutunetik 12,1-4

Senideok:

Guk ere, hainbat eta hainbat testiguz inguraturik gaudenok, astin dezagun oztopo zaigun guztia eta itsasten zaigun bekatua, eta ekin diezaiogun etsi gabe aurrean dugun lasterketari. Jar ditzagun begiak geure fedearen iturburu eta betetzailerik dugun Jesusengan; honek, itxaro zuen zorionagatik, gurutzean hiltzea onartu zuen, heriotza lotsagarria zela kontuan hartu gabe, eta orain Jainkoaren tronuari eskuinaldean eserita dago. Gogora ezazue, bada, bekatarien aldetik halako eraso gogorra jasan zuen hura, adorea galdu eta etsi ez dezazuen. Ez zarete oraindik bizia galtzeraino iritsi bekatuaren kontrako zeuen borrokan.

Jaunak esna.

Aleluia Jn 10,27

Aleluia, aleluia.
Nire ardiek nire ahotsa entzuten dute, - dio Jaunak –
eta nik ezagutzen ditut; haiek atzetik jarraitzen didate. Aleluia.

EBANJELIOA

Bakerik, baizik eta zatiketarik ez ekartzera ez naiz etorri.

+ Jesukristoren Ebanjelioa san Lukasen liburutik 12,49-53

«Lurrean sua jartzera etorri naiz, eta nahiago nuke dagoeneko piztua balego!
Heriotza-uretan murgildu behar dut, eta hau nire larria hori bete arte!

«Munduari bakea ematera etorria naizela uste al duzue? Egia esan, bakea ez, banaketa baizik. Zeren hemendik aurrera, etxe bateko bost senideak elkarrekin banaturik egongo baitira: hiru biren kontra eta bi hiruren kontra; aita semearen aurka eta semea aitaren aurka, ama alabaren kontra eta alaba amaren kontra, amaginarreba errainaren kontra eta erraina amaginarrebaren kontra».

Jaunak esana.

Blog: <https://homiliaspagola.blogspot.com/>